

國朝耆獻類徵初編卷三百七十三目錄

忠義四十三

關天培

麥廷章

祥福 劉大忠

周枋

劉大慶 馬三元

江繼芸

凌志

張然

王世俊 蔣恩錫

葛雲飛

鄭國鴻

王錫朋

張玉衡 武英太

李躍淵 李雲龍等

謝朝恩

陳慶三 金壘等

裕謙

師長治 王光宇等

國朝耆獻類徵初編卷三百七十三

通奉大夫前署江西巡撫江西布政使司布政使湘陰李桓輯
忠義四十三

關天培

關天培江南山陽人嘉慶八年由行伍考取武生拔補外委歷升
千總十七年遷揚州營守備二十五年調奇兵營守備道光三年
超擢蘇松鎮標左營游擊四年升川沙營參將六年遷太湖營水
師副將十月以督護海運出力下部優敘七年擢蘇松鎮總兵十
三年署江南提督十四年授廣東水師提督十五年四月偕兩廣
總督盧坤奏查虎門礮臺籌議增修請添鑄六千斤以上大礮四

十位酌派各臺應用並將南山礮臺前面餘地添築石基建設月臺礮位橫檔背面山麓及對岸盧灣山腳各建礮臺一座其沙角大角兩處作爲瞭望探信之臺自南山礮臺起至大虎礮臺分作三股防堵一聞信礮卽分上中下三路轟擊得旨允行閏六月復會奏整頓捕務並請增改營制一南雄州韶州府屬與湖南連界河道應添汛防一惠州府連平州宜移設員弁一廉州府屬臺汛兵丁應水陸互易並勻撥弁兵巡防一瓊州府屬之儋崖二州應添設巡洋兵船下部議行十六年四月偕總督鄧廷楨奏防夷經費請於每年二月杪八月初分飭本標將備率親兵五百餘名分赴威遠鎮遠橫檔大澆永安鞏固六處練習礮準其大角沙角

礮臺等處其兵六百四十名每次操演以十日爲度計每年需用正項及另加賞犒銀共六千七百餘兩均由抄產變價生息及裁撤巡船節省項下撥給 從之十八年英吉利目馬他倫私進澳門託言稽查夷商事務妄遞無稟字信函天培斥以不遵定制抗禮傳書親督將弁將馬他倫逐出銅鼓外洋十九年三月會同欽差大臣林則徐查禁英夷躉船鴉片煙土勒繳二萬二百八十三箱計二百餘萬斤取具各夷切結存案得 旨交部議敘六月督造排椿鐵鍊安置橫檔山前海面較狹之處並於威遠礮臺迤西添築大礮臺一座以資防禦奏入報 聞十一月夷船駛入省河踞官涌天培率兵擊走之時匪艇全數屯尖沙觜乘勝掩擊均退

出外洋 諭曰此次攻擊夷船提督關天培奮勇直前身先士卒
可嘉之至著賞給法福靈阿巴圖魯名號仍交部從優議敘以示
獎勵二十一年正月英夷攻占沙角等礮臺 諭曰逆夷到粵以
後日肆猖獗經朕嚴諭該省嚴密周防相機剿辦該文武大員宜
如何妥爲布置本日據琦善馳奏該處沙角礮臺竟爲逆夷占奪
大角礮臺亦爲攻破並有戕傷將弁搶奪師船之事關天培身任
提督統轄水師平時旣督率無方臨時又蒼黃失措著先行革去
頂帶仍令戴罪立功以觀後效二月夷船擁入三門口衝近排樁
斷其鍊樁盡拔以火箭燬官廠民房天培督兵擊退會南風作夷
船復以大隊圍橫檔永安兩礮臺先截援道乘風施礮風益猛礮

臺陷進攻虎門天培督兵據礮臺拒戰自己至酉兵潰天培親執
大礮火門透水礮不得發逆夷自臺後上天培格殺數賊槍箭雨
至負創奮鬪力竭歿於陣事 聞 諭曰逆夷攻擊虎門礮臺及
烏涌卡座廣東水師提督關天培被害殊堪憫惻著加恩賜卹三
月 諭曰昨因虎門失守提督陣亡降旨令兵部議卹茲據該部議
奏關天培除照例賞給銀兩准予世職外著該督撫查明伊子孫
幾人均於服闋後送部帶領引見候朕施恩該員統領士卒爲國
捐軀著卽在遇害地方建立專祠以慰忠魂而彰節義尋 賜祭
葬入祀昭忠祠謚忠節七月復 諭曰關天培次子關從龍見年
已十八歲著於服闋後送部引見伊母吳氏年逾八十著地方官

每月酌量給予銀米以養餘年子從龍襲騎都尉安徽候補同知

右 國史館本傳

公名天培字仲因一字滋圃姓關氏山陽人也起家行伍歷淮安城守營守備揚州中營守備獲私鑄王國英等十八人署溧陽營都司獲逆嚴加烈等二十五人移兩江督標左營守備歷中軍都司外海水師奇營守備奇營游擊道光二年外洋獲盜最三年署吳淞營參將旋即真後二年東南方議海運海運自明以來輟數百年議者紛錯大府舉公任其事六年二月督米船千百四十五艘米百二十四萬一千餘石自吳淞抵天津先期功最署太湖營副將明年署蘇淞鎮總兵官旋即真十三年入朝 上御便殿召

見五軍機記名明年夷事萌芽先是西南諸夷暹羅真臘越南之屬皆恭順受職貢惟英吉利最遠強黠嘉慶間一人貢嚴衛出海至是夷目律勞卑來不如約兵船駛至黃埔河兩廣總督盧坤水師提督李增階坐疏防落職而以公爲廣東水師提督公至則親歷重洋觀阨塞建臺守排鐵索軍務肅然東南倚以爲重公容貌如常人悛悛畏謹而洞識機要口占應對悉中暇則習弓馬擊刺技絕精在廣著籌海集識者比之戚少保云公居虎門六年而禁煙事起當是時洋煙流毒徧天下前侍郎黃爵滋發其事 上命內外大臣雜議議定著爲令而英吉利躉船適至躉船者販煙船也公旣習於海而前欽差大臣林公則徐威略素著與公尤協力

至則拘夷目錮其船船不得發獲煙土二萬二百餘箱焚之奏

聞上大悅敘功有差夷計不得逞明年四月驟師入浙江據定海分船溯大洋上天津詭投書乞和而前直隸總督琦善馳傳赴廣東林公以罪去於是和議興海防撤矣廣東邊海門戶曰香山虎門香山奧衍易盤踞去省少紆遠虎門險狹海道曲折去省近虎門外列十臺最外大角沙角二臺屹爲東南屏蔽是年十二月夷攻大角沙角壞師船而大帥日以文書與夷往來冀得少遼緩夷不報命而急戰戰方交則投書議和書報復戰晝夜攻掠不已時諸軍集廣府者駐防滿兵督標撫標兵兵不下萬人又調集省兵團練鄉勇民兵數萬而大帥所遣助守臺者撫標二百人駐東

芑提標兵二百人備策應由是二臺日益孤危相繼陷沒二十一年春正月夷進攻威遠靖遠諸臺守者羸兵數百公遣將慟哭請師無應者初公之以海運入都也時從故人飲酒肆中醉而言曰日者謂吾祿命生當揚威死當血食今吾年四十餘安有是哉已而歎曰丈夫受國恩有急死耳終不爲妻子計公老母年八十餘長子奎龍吳淞參將前卒幼子先遣歸及是乃緘一匣寄家人堅不可開公死後啟視則墮齒數枚舊衣數襲而已公旣自度眾寡不敵而援絕乃決自爲計駐靖遠臺晝夜督戰已而夷大艘奄至公率游擊麥廷章奮勇登臺大呼督厲士卒士卒呼聲撼山海水沸揚杳冥晝晦自卯至未所殺傷過當而身亦受數十創血淋

澆衣甲盡溼事急呼其僕孫長慶使去長慶哭曰奴隨主數十年
矣今有急義不使主死而已獨全手持公衣不可開公怒拔刀築
之曰吾上負皇上下負老母死猶晚汝不去吾斬汝矣投之印
長慶號而走比及山半迴顧公隕絕於地時二月六日也長慶既
去懸尸自縊下下負水多蘆根刺體如蝟卒負重創送印大府所
而身復至臺求公尸夷人嚴兵守臺則乞通事吳某以情告吳某
者嘗爲漢奸公得之宥弗殺給事左右恆思所以報公至是爲長
慶說夷誠懇反復夷人義許之入求尸鉞交於胸長慶膝行前徧
索不得卒詣公所立處舉他尸數十乃得之半體焦焉事聞
天子震悼予騎都尉世職諡忠節賜葬如禮喪至之日士大夫

數百人縞衣迎送道旁觀者或痛哭失聲而長慶得公尸後復求得麥廷章之半體與公尸皆徒負以歸水陸七千里公葬後恆鬱鬱不樂言及公必泣下未幾卒

論曰甚矣虎門之敗也悲夫可爲流涕者矣方公之經營十臺累戰皆捷奏上公卿相賀主上爲之前席嘉嘆至於再三然而釁發於定海詐成於天津夷不爲無謀要豈夷人能死公哉詩曰誰生厲階至今爲梗厲有階矣長慶義士誠感犬羊吳某奸耳知感恩爲一日之報異哉

右家傳魯一同撰

廣東夷變提督關公天培守靖遠李潤堂守威遠馬辰多隆守定

遠皆不過數百兵進不能戰退不能守門戶藩籬全不足恃關公與諸提鎮請於欽差大臣琦善力訴礮臺危急坐以待斃狀不得兵慟哭不行琦善怒曰不到礮臺是畏死卽以軍法從事諸將曰礮臺何敢不往第兵則不發徒往何益是迫之死也 國家死數提鎮殊不足惜第恐大勢一壞喪師失地於國體有關耳不聽獵德以外各礮臺相繼失守關公天培暨總兵祥福遊擊麥廷章都司沈占鼈守備洪達科同時中礮陣亡關公身受數十創半體焦爛廷章亦祇存半體公僕孫長慶旣受公命送印大府所返而求公尸膝行入夷人營鉞交於胸歷舉他尸數十審視乃得之夷眾雖忌公而心敬其人獨琦善靜鎮如故由是英吉利進偪省垣矣

胡夏米甲利之初至吳淞也關公奉檄押護南行及浙江交替回
蘇夷又揚帆北駛奉 旨嚴詰大吏將罪公公曰某送之浙人受
之當時取有咨文非以空言塞責也由浙北駛責在浙人大吏無
以紂乃止公在官訓練操防獨勤其職他營多廢弛因以尼公公
曰水師與陸路異陸路居腹裏姦宄綫索易得不至一發無所制
洋盜出沒剽劫動輒戕命我輩職司禁暴奈何聽盜賊白晝殺人
而不預爲計哉初議海運督撫知公才檄委護送時洋盜羣聚山
島間素敬關帝至是從山上望見糧艘纛旗大書關字破浪煙霧
中似有人坐艤樓一人侍立持大刀如世所繪關帝象者羣盜竟
羅拜不敢犯

關忠節公之喪歸自粵東時公長子早歿夫人請以長子之蔭蔭次子長子婦不可姑婦成訟卒歸長孫而次子蔭典降一等或曰難蔭 國恩也在家庭爲不幸祖父殺身而卹及子孫其又何爭焉葬之日有老農扶杖而觀曰是亦人耳嚮者某尙書侍郎之生榮之而弗思及其喪也哀之而弗敬今不知敬慕之何自生也君子曰農乃微言

右筆記黃鈞宰撰

麥廷章

麥廷章廣東鶴山人道光十年由行伍拔補水師提標右營外委
十一年升把總十二年四月連州猺匪糾黨遙應楚猺助勢煽亂
官兵分路剿捕廷章首先奮勇入山殲賊甚眾十月隨提督李增
階巡洋先後拏獲尖頭魚船及賊匪黃猛等數十名十三年三月
升千總旋署中營守備十二月升海口營水師守備十五年護本
營參將十六年升碣石鎮右營都司十九年署提標左營游擊時
欽差大臣林則徐查辦英夷躉船鴉片煙土檄廷章偕參將賴恩
爵帶領師船在九龍山口岸查禁接濟防護礮臺遇夷目義律乘
船妄遞稟信廷章等曲爲開導夷匪輒肆鴟張礮火齊發我兵施